

## **Wrkapm a Sut nira Yangkipm a la ela ep**

Yangkipm a la ela wrkapm kil pa wreren kolen a ela wrkapm katnukg a Pita nira pa. Kil lanaki tu wrong kin a kipman a Maur Wailen pa la, ake mpa tu itning yangkipm a tu a awi wrong manto lan yangkipm a Maur Wailen pa. Kil lala ake mpa melnum ur wa plelngen yangkipm wor a Maur Wailen a pikekg tu ukipma katnun ep pa kai manet, pa kalpis.

### **Kipm mpa rpmi uk ikg riwe tu melnum a kaling plantepm yangkipm pa**

<sup>1</sup> Kupm Sut, kupm melnum akwapel a orng-watneikgen Sisas Kraiss, a wa kupm paipmen a Semis.\* Kupm nira wrkapm kil eng kipm wrong kin a kipman a Yan Maur Wailen. Kil plan ipma wor wasrongentepm, a wa akwewepm ayekul eng alkilen, a wa ikgalentepm ariworwor itna, la ikga uk kai wam a Sisas Kraiss pa.

<sup>2</sup> Wa kupm oklala naki Maur Wailen eng mpa kil reinsepem a lkepm ipma meen wor a ngklinsepem eng mpa kipm plan ipma wor wasrongen tita. Pa kupm asentel la nkgwalpm ari pa mpa

---

**1:1 1:1** Mat 13:55    \*    **1:1 1:1** Semis ekg Sut pa man wris rakuwen.

palng wail a wail titnongket itni kawor ipma akipmen pa kolpa iye kai.

*Tu melnum a kaling plan yangkipm ti kai manet pa tu ikga uwi wleket paipm*

<sup>3</sup> Kolpa ti workganen yekyek alkupm, kupm wasrongen paipm la nira wrkapm ur kai eng ik lanikepm kwap a pikekg Maur Wailen kil ak awiyo eng alkilen pa, pa kil ak angklinso kimeket irir, atom kupm la nirantepm ikla pake. Ari kalpis, kupm mpa wa nira lanikepm yangkipm wail manet ur kil, atom kupm tilpepm titnongket la, kipm itni titnongket tulpulng tu a awi wrong manto lan nikgwalpm a mentepm ukipma yangkipm wor a Maur Wailen pa. Am yangkipm wor a Maur Wailen pikekg akwewo atom mentepm wrongkwail kin a kipman alkilen yela ukipma katnun am pake. Ake mpa wa melnum ur plelngen nikgwalpm akipmen pa atom kipm wa ukipma kutnun yangkipm manet ur pa, kalpis.

<sup>4</sup> Eng ntei, tu melnum tiur a talpulng yangkipm a Maur Wailen pa, tu pikekg wli akangkompen kipm ti antiwepm rpma pa. Tu plelngen yangkipm wor a la Maur Wailen plan ipma wor ak angklin mentepm ti wa kai manet. Tu wa plelngen yangkipm kil kolkil la, Maur Wailen pa kil wa awi wor la mentepm ntokg kweikwei paipm paipm kimpilpet pa pati pa wor, pa ake paipm pa, kalpis. Wa tu lam nang a Wailen Sisas Kraiss, mring tukgunakg wris anangket a mentepm orngwatneikgen pa. Kolpa atom pikekg

Maur Wailen la ep ak ai kolpa la, tu pa ikga itni yangkipm atom ikga yangkipm kalpisen a ikilmpe yangkipm akilen, atom tu ikga kai paipm.

<sup>5</sup> Kol yangkipm a kupm la lanikepm kil pa kipm pikekg ariwe kimeket ise, pake kupm la wa la eng ik ngkitempm nkgwalpm a pikekg Wailen kil angklin tu Isrel atom awiyen aye kai takwlelkgen anong kanokg Isip pa. Ari tu angkom or ya pa kai alm kowangel Wailen pa, kolpa atom ari kil wa antokg tu wailet tiur amo atnen a tu ake ukipma kil pa.

<sup>6</sup> A kupm la wa ngkitempm nkgwalpm la kipm ikwonilmpen tu maur akwapel tiur a Maur Wailen pa: tu ake la ikwonilmpen nang wailen a pikekg Maur Wailen alken pa, tu atnuurng wrik wor alntu pa. Atom Maur Wailen kil angkuten-ten ak ampei kalnten a ikga itni yongkyong pa, atom angkliwen elng kinar rpma wrik miningket turkget paipm pa rpma nungkwangen wang wail a ikga ntokg yangkipm itni Maur Wailen pa.

<sup>7</sup> Am wa kolen anong wekg Sotom a Komora pa a wa anong tiur a ela wreren anong wekg pa. Tu pikekg antokg kweikwei paipm kolen tu maur akwapel a Maur Wailen antokg pa. Tu ipmanig wrekg antokg kweikwei paipm paipm a uk num paipm a numkropis kamel, a tu ake okg kin kipman katila ya kol a okg kin kipman pa wa tu ak kai manet. Kolpa atom Maur Wailen kil lap anong pa kai paipm akalmpe paipmpaipm a tu antokg pa.

Kil pikekg ak kolpa ak plan tu pa kol kla ur a kil elngtitna la ikga wrongkwail kin a kipman a antokg kweikwei paipm paipm a kolpa ri, atom tu ikwonilmpen la Maur Wailen ikgam unkwanten ngkliwen elngkinar lkim watin a wakg atne itna yongkyong pake.

<sup>8</sup> Tu melnum tiur a antiwepm rpma atom plelngen yangkipm wor a Maur Wailen ti wa kai manet pa, tu pa am wa kolpa yat pake. Tu la Maur ti planten kweikwei kolpa atom ak ngkat nkgwalpmel tu pa wrekg wa antokg kuina ur a paipm kolpa ak kimpilpetel tu alntu. A tu nungkulkget atom tu ake orngwatneikgen mla ur a itna ep ikgalento ti. A wa tu la paipmel tu maur klalen antiwe titnongket ai.

<sup>9</sup> Kol am tu maur akwapel a Maur Wailen pa la paipmel Satan pake, ari tu pa wa kalpis. Kol am Maikel, maur akwapel a itna ep pa pikekg anti Satan ekg alilakel tita num palk a Moses la uwen pa, kil ake wa la paipmel arki Satan pa, kalpis. Kil ake la uwi kwap a Wailen pa, kol am Wailen kil alkil pa ok ntiwel pake, kolpa atom kil lanakel kolti la, "Wailen pa mpa ikilmpe paipm akitnen pawo!"

<sup>10</sup> Pake tu melnum paipm a kolpa a wli antiwepm rpma pa, tu la paipmel kweikwei a tu alntu ti ake wa ariwe. Tu antokg katila kolen tu wlikgok tilpmingen a nkgwalpm kalpisen wasrongen la ntokg kuina ur a tu alntu ti wasrongen la tu a ntokg pa. Ariwe kol a tu katnun wlikgok tilpmingen pa, pa antokg tu kai paipm. Tu antokg

kolpa pati, pa tu antokg paipm tu alntu.

<sup>11</sup> Woi, kipm pa, tu pa ikga uwi paipm! Tu pa katila nkgwalpm paipm kolen a Ken pa. A wa tu la uwi marpm kolti kutnun kol a pikekg Palam alok tu Isrel kai ar pa. Wa tu ake orngwatneikgen melnum wailen a ikgalenten pa kolen a pikekg Kora wrekg la nolankil Moses pa, ti tu pa ikga uwi paipm.

<sup>12</sup> Kipm melnum a ukipma Sisas pa kai rka wris eng antokg okipma ur al ak plan nkgwalpm a kipm uk ipma wor wasrongen tita pa, tu melnum paipm kolpa antiwepm rpma pa, mpa tu wangk-wrisen kipm pa ti kipm mpa paipm. Tu al manto manto kolti la ikngklin tu alntu ti kolti. Tu kolen u waipmunu kaikut a kol a uwei ari kalpis, wripm el unkwang aye kai atn kol ur ise. Wa tu kolen yo aipiken a ake oken. A wa kolen yo a yokg almpen atom nungkwor pa. Atom tu kol amo anti wekg ise.

<sup>13</sup> Tu pa kolen unokg wail a ngkat tapor wail pa. Ake tu numpaipm eng antokg kweikwei a numpaipm num kropis itna wunong wunong wulmpa a wrongkwail kolen unokg ipopm a ela unokg kwa pa. A wa tu kolen kleinup a narku ti ake katila ya alkil a ore pa. Kolpa ti Maur Wailen kil nimprampen lkim miningket turkget paipm ai ak namput tu pa elng itna eng ikga tu kinar rpmi pa yongkyong.

<sup>14</sup> Kol ik ker uwiye tu wapyipmiri a walyipmiri ngkiten ingkai Atam ai kulngkul, kul ngko

---

**1:11 1:11** Ngkat 4:7-8; Angk 16:1-35; 22:1-35; 2 Pi 2:15; 1 Son 3:12

**1:12 1:12** 2 Pi 2:13,17

**1:14 1:14** Ngkat 5:18,21-24

Enok pa, pa wapyipmiri walyipmiri wampwomis wampwompwegk. Pikekg Maur Wailen ngkat okel Enok pa la tu melnum paipm pa kolpa la, “Kipm riri, Wailen kil nar nampikgen tu maur klalen akwapel wailet paipm alkilen ai!

<sup>15</sup> Kil nar eng mpa uwi tu wrongkwail pa iye kai itni yangkipm, atom mpa kil uk wleket tu a ake ukipma kil pa ikilmpe paipmpaipm wrongkwail a pikekg tu antokg katnun nkgwalpm paipm a tu la uk yirokg kil pa. A mpa wa kil ikilmpe yangkipmok paipm paipm wrongkwail a pikekg tu lawel pa.”

<sup>16</sup> Tu melnum a pikekg Enok la pa, tu paipm kolkil: pa tu awi ipma kalkut la watipmen tintang tintang eng kuina ur a palngten pa. A tu wa katnun nkgwalpm wasrongen paipm a numpalk atuwen ti. Wa tu aro ok ngkat nang alntu ti, wa tu armpwonel ningkail tu melnum la kul ntokg kuina ur kutnun nkgwalpm a tu tike.

*Sut la alupm alupm tu la tu ukipma itni tit-nongket*

<sup>17</sup> Pake workganen yekyek alkupm, kipm wonrpme yangkipm a pikekg tu melnum wokgen akwapel a Sisas Kraiss Wailen amentepmen laron nakepm ep pa.

<sup>18</sup> Pikekg tu laron nakepm la, “Ikga ik wang umpuwen pa, tu melnum a ak nokgel kamel pa ikga wli, atom tu uk yirokg Maur Wailen a antokg kuina ur katnun nkgwalpm wasrongen paipm a numpalk atuwen pa kolti.”

<sup>19</sup> Tu melnum a ak paipm kolpa pa tu wako aro wrong kin a kipman a ukipma Maur Wailen a kaingkai takwem rka wris pa. Tu rpma katnun ipma tingklaket alntu a itna kanokg a ti kolti. Atom Maur Wor a Maur Wailen pikekg tu awi pa am atnuurngken ise.

<sup>20</sup> Pake kipm workganen yekyek alkupm, kipm ukipma KraiS Sis pa kol ong a kipm uwen kolpa ti kipm le wan krimperket a ukipma pa eli ong pa riworwor itni titnongket kolpa iye kai o! Kipm elng Maur Wor a Maur Wailen pa rpmi kipm pa eng mpa kipm oklala niki Maur Wailen pa ik titnongket a Maur Wor pa.

<sup>21</sup> Nikgwalpm a Maur Wailen plan ipma wor wasrongentepm pa mpa kipm lupmen rpmi eng mpa iglentepm kolpa kai. Atom mpa kipm rpmi nungkwangen Wailen Sis kil ikga plan ipma wor akilen a kil areinsepm pa palng ngko wunong atom ik uwiyeypm iye kai ntiwel rpmi wor yongkyong.

<sup>22</sup> Kipm rein ngklin tu melnum a nikgwalpm a rka wekg wekg a ake ukipma itna titnongket pa.

<sup>23</sup> Tu melnum tiur pa itna kolen lala ikga ngkli elng kai wakg, kolpa ti kipm rein eng mplim tu a itna kai wakg pa iye yaper kul. Kipm la rein eng ngklin tu pa, kipm ik ik ngkirke. A kipm itni watin tukwelkg tu melnum a kolpa. Tu pa katnun ipma tingklaket alntu kolpa ti tu palng kimpilpet. Wa apm atuwen ti wa kimpilpet yat. Kolpa ti kipm itni watin tukuleikgen kweikwei a kimpilpet itna wulmpa a Maur Wailen pa.

*Mentepm mpa ngkit nang a Maur Wailen*

<sup>24</sup> Mentepm mpa ngkit nang a Maur Wailen! Kil Maur Wailen a antiwe titnongket a ikgalentepm ariworwor, ti kipm ake antiwe mpa wutat itni kanokg iprak pa ngko pa. Kil melnum a antiwe uwiyepm iye kaino ntiwel rpmi anong klalen alkil ai, a wa kil ikga ri kipm pa la kipm pa wriwen wor kolti, paipmpaipm kalpisen, ti kipm ikga tipra itopen wail manten.

<sup>25</sup> Am kil alkil wris ata pa kil Maur Wailen, wa kil melnum a pikekg ukwa Sisas Krai Wailen amentepmen pa kil nar akawiyo aye yaper kai eng kil. Ti mentepm mpa itopen ngkit nang akilen itnen kil awi nang wailen, a kil klalen wail manten, kil antiwe titnongket wail manten, kil itna tukgunakg ikgalen kweikwei wrongkwail. Pikekg ep kil am rpma kolpa rpma pake, wa ak wang ti kil rpma, a wa ikga wa ik wang kutnukg pa, kil ikgam rpmi wa iye or pa kai itni lantlan kolpa rpmi pake. Ti mentepm itopen ngkit nang akilen pa iye kaino kwa! Aklale.

Wrkapm a kupm nirantepm ti pa am kai itna kolpake.

**Kla Weten A Maur Wailen Lam**  
**The New Testament in the main dialect of the Urim**  
**language of Papua New Guinea**  
**Nupela Testamen long tokples Urim long Niugini**

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

---

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5